

مُحَمَّدُ إِبرَاهِيمَ

واتقنا

عن المواعيد المؤجلة . . والأمنيات

ديوان
بالعامية
المصرية





لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



محمد إبراهيم: واتقابلنا، ديوان بالعامية المصرية
الطبعة العربية الأولى: ديسمبر ٢٠١٨

رقم الإيداع: ٢٧١٨٩ / ٢٠١٨ - التقييم الدولي: 9 - 149 - 806 - 977 - 978
جميع حقوق الطبع والنشر محفوظة للناشر
لا يجوز استخدام أو إعادة طباعة أي جزء من هذا الكتاب بأي طريقة
بدون الحصول على الموافقة الخطية من الناشر.

© دار دَوْن

عضو اتحاد الناشرين المصريين.

عضو اتحاد الناشرين العرب.

القاهرة - مصر

Mob +2 - 01020220053

info@dardawen.com

للمزيد من الروايات والكتب الحصرية
انضموا لجروب سائر الكتب

sa7eralkutub.com

او زيارة موقعنا

محمد إبراهيم

واتقابلنا

ديوان بالعامية المصرية

دَوْنُ



للمؤلف من الروايات والكتب الحصرية
انضموا لجزء من أسرار الكتب

sa7eralkutub.com

او زيارة موقعنا

فهرس الموضوعات

٥	إهداء
٧	ماليش في الناس
٩	حقيقة الناس متعرفهاش
١٢	نفس الأيام
١٦	إبعد عن كل البني آدمين
٢٠	تفاصيل يجوز أصغر من اللازم
٢٤	على قد ما أنام
٢٥	المحتاج لصديق
٢٨	لو عندك وقت
٣١	العالم لسه مكان ضيق
٣٦	بعد الثلاثين
٤٢	مليش في الناس
٤٩	قبل ما يفوتنا الحنين
٥١	كلاني مفارقك امبارح
٥٦	وربنا فجاء عوضنا

- ٥٩ جميله بكل شئ فيكي
- ٦٢ التلج داب
- ٦٥ لو كنا جيران
- ٦٨ وشايفك دنيا في الدنيا
- ٧٢ أغنيه فرنسيه حزينه
- ٧٧ وكأنك ماضي ملوش قيمه
- ٨١ زي القمر
- ٨٤ «ماتر جعيليش» ..
- ٩٣ كنت علشانك بحارب
- ٩٩ «يا ريتني مشيت» ..
- ١٠٥ فيلم اسمه إسكندرية
- ١٠٧ اسكندرية ليه (ولد وبنت)
- ١١٢ لسعة برد / ميامي ٤٥
- ١٢٠ مع السلامة يا بحر (النهاية)
- ١٢٧ نقطة ومن أول يناير



سبعة أكتوب

للمزيد من الروايات والكتب الحصرية

انضموا لجروب سحر الكتب

او زيارة موقعنا



للمزيد من الروايات والكتب الحصرية
انضموا لجروب سحر الكتب

sa7eralkutub.com

او زيارة موقعنا

إهداء

إهداء لزوجتي العزيزة.. لطفلي الكبرى وكل رصيدي من
الأمل والأمان في هذا العالم
«آية عماد الدين فؤاد»
أحبك كثيرًا
إلى أبي.. وأمي..
شكراً على كل ما فعلته من أجلي.. شكراً من كل قلبي..
إهداء خاص جداً
إلى جمهوري الرائع، لكل المتحمين إلى عائلتي الكبيرة على كل
منصات التواصل الاجتماعي.. شكراً لكم على كل هذا الكم
الهائل من الحب، ومن الدعم.

خالص حبي وتقديري

محمد إبراهيم



ما ليش في الناس



رسالة لخدمة ديننا ووطننا

حقيقة الناس متعرفهاش

حقيقة الناس متعرفهاش
 في جرح فد قلبي متغطاش
 فيه حالة حزن مش عارف سببها وسرها للآن
 أنا قلشان
 بواجه كل شيء خايف
 ودائماً مضطرب وكئيب
 ويسرح بالساعات أوقات
 وبتخيل
 سيناريو حاجات هتحصل أو خلاص حصلت
 رسايل عمرها ما وصلت
 كلام لازم أقوله.. بس أنا مخبيه
 مهدئ مش بنام غير بيه
 مريض نفسي..
 بعالج نفسي من شكى في أعز الناس
 وبقفل أوضني بالترباس

ويثقل قلبي ع الماضي
 كان الدنيا كوابية
 لا راضي نصّها المليون
 ولا باصص على الفاضي
 كان الدنيا شيء عادي
 متعلقش بيها صحيح
 لكن برضه مبكر ههاش
 بحس ساعات
 بأن ميزان حياتي اختل
 بدور في الطريق على حل
 بتوه كل ما أحاول.. ألقى حل بديل
 وطول الوقت بتزاول مع التفاصيل
 تمام عيني لكن قلبي مبيتامش النهار والليل
 قابلت حاجات
 مكشش في بالي هتعددي
 لكن عدت
 سكك أنا شوقتها بتفتح في وشي بعد ما اتسدت
 هزايم مدهشه جداً

وخارج منها من غير خدش
مخدش حظي م الفرحة وقلبي مخدش
مخدش غير وجع زايد
وفرحة بشوقها بس طشاش
حقيقة الناس متعرفهاش

نفس الأيام

أيام بتدور..
واحنا ف دايرتها نتوه ونلف
نخاف ونخف.. ونتعلق
ونقلق ونعيش ع الحافة
أيام جافة..
تفاصيلها بتتكرر بهدوء يقتل بشو يش
وكأنك يومياً فعلاً بتموت وتعيش
نفس الأيام..
نفس الأحداث
نفس الإحساس اللي ملازمك
وشعورك أنك طول الوقت
بتكتم جواك وتخبي
قلبك بقى شايل ومعبي..
محبوس في سيناريو معدش قديم
ومعدش داري بأحزانك

ومحدثش موجود علشانك
بتسلم نفسك للضلمة
وتصاحب رسة دخانك
وتبص لنفسك في مرايتك.. يمكن تلاقيك
أو حتى تلاقى حاجات منك
مستغرب نفسك مع إنك
إنت اللي بتعمل كل ده فيك
انت اللي آمنت لناس يمكن
لو كانوا كلاب.. كات تمرت فيهم أفعالك
انت اللي مشيت وواربت الباب
ولا حد افتكرك ولا جالك
انت اللي بقيت على كل الناس
ومفيش ولا حد اتبقالك
غلبان علشان قلبك طيب
دايمًا تتعامل بسماحة
ناسي ان الناس بتعض في بعض..
من أول قطعة تفاحة
من أول مرة الكون فيها
شاف أخ بيقتل أخوه عن عمد

لله الحمد...

عمرك ما ظلمت صحيح لكن..

عائش مظلوم

بيدوسوا عليك كل ما بتقوم..

تسهر ويناموا ويشبعوا نوم

يا أبو قلب أبيض.. وضمير صاحي

يا أبو عين بتدمع على أتفه واغرب أسباب

هتعيش ازاي بدموع صادقة ف عالم كذاب

هتعيش ازاي

مع ناس لو طالت تاكلك أكل

هتاكلك أكل..

مع ناس بتقيس الناس بالشكل

مع فوضى وغم

وضلمة وشك

وعك وناس بقلوب «فالصو»

كان فيه ناس زيك بس خلاص..

الناس خلصوا

وانت اللي بقيت آخر نسخة

آخر نسخة

آخر بني آدم فإكر إن الكون هادي
والدنيا تمام

ومفیش صراعات من تحت لتحت
أنا آخر واحد كان أعمى..
وبفضل لله فعلاً فتحت

إبعد عن كل النبي آدميين

والله الواحد مش عارف يلاقىها منين؟

أو يهرب فين؟

أو ياخذ جنب ازاي منكم؟

أنا فعلاً ما بقتش ضامنكم

ولا ضامن حد يشيل همي

أو يسند كتفي ف وقت ما أقع

أنا جسمي خلاص بقى كله بقع

عمال أحصد خيبات أملي

وسنين صبري

قتلوني وواقفين على قبري

ماشيين ف جنازتي بيبكوا صحيح

لكن والله دموع تماسيح

ومحدث حاسس ايه فيا

ومحدث داري بأوجاعي

بآمنهم بندم على طيبي

بعضنهم.. ببعضوا دراعي!

على فكرة العالم مش قاسي

احنا اللي جناة

احنا الأسباب الرئيسية

لكل اللي بيحصل من مأساة

احنا اللي زرعنا في بعض الشوك

فطبيعي اننا نحصد معاناة

خلوني أكون وحدي شوية..

يمكن وحدي هتعوضني

صاحب علمته ازاي يصطاد..

أول ما اصطاد إنسان.. صادني

الدنيا غريبة يا حول الله..

والعالم ضاق

الناس في سباق

أزمتنا بقت أزمة أخلاق..

تايه وكأني غريب أعمى

عايش وكأني في أرض نفاق..!

الواحد عاش عمره يضيع

في حاجات كان لازم يراعيها

وحاجات لازم تتساب لكن
 كان هو الي متبت فيها
 وفي آخر القصة بقيت حاسس
 إن أنا بشتري هوا في أزايز..
 وخلاصة الموضوع كام كلمة..
 اسمعهم يعني ده لو عايز
 القلب الأبيض عيشة صاحبه بتبقى سواد
 والبتت الي انت بتعشقها
 غيرك بيخلف منها ولاد
 كلنا جايين ف معاد معروف
 كلنا ماشيين بردك بمعاد
 فبلاش تعمل أزمات كدابة بدون لزمة
 وتخط أكثر من مرة على نفس الباب
 فيه ناس هتسيبك في الأزمة
 إوعاك تديهم من وقتك بعد ما تتساب
 ارميهم زي ما عشت بترمي.. هدوم ضاقت
 أو جزمة اتقطعت أو دابت من كتر اللف
 وساعتها هتشعر بس انك..
 قادر تمشي

وساعتها هتشعر انك أقوى وجرحك خف
 انت اللي بإيدك تتجاوز.. كل الصدمات
 هتبطل بس تفكر فيهم مع نفسك..
 أول ما تحس انك بطلت ندم وعياط
 أنا قلت وهفضل أقول دايمًا: «كلنا فترات»
 بيع اللي بيعك بسلاسة
 ومن غير تفكير

العمر خلاص مبقاش متحمل دوشة كثير
 مبقاش متحمل زحمة ناس محسوبة صحاب
 لكن أغراب..

أول ما تقرب تلاقيهم خيالات وسراب
 العمر خلاص مبقاش متحمل ناس تانيين
 لو تقدر.. ولو ان ده مش سهل
 «ابعد عن كل البني آدمين»

تفاصيل يجوز أصغر من اللازم

تفاصيل يجوز أصغر من اللازم
 لكن بتفرق للأسف جداً
 صوت المطر أول ما تدخل ينائر
 ريحة الهدوم بالبرفونات والسجاير
 والشمس لما تدوب في لون الستائر
 والوحدة لما تتوه في طعم الشاي
 تفاصيل كثير مبيتسألش «ازاي»؟
 فيه حاجات عشان نوصفها نتكلم
 وحاجات عشان نوصفها نسكت بس،
 أجل ما فيها انها بتتحسن.
 تتعاش بكل ما فيها وما فينا
 تصبح عادات بنحبها وخلص
 فيبقى حب في منتهى الإخلاص
 تفاصيل بتفضل مهما غاب أشخاص
 فيعوضوك عن كل واحد غاب

وبيفتحولك باب..
على دنيا فيها الونس
والراحة م الفرجة ع الناس قصاصد شاشة
نقدر نقول باشا

وبتبقى صاحب مزاج..

عايش ومش محتاج
غير وحدثك وهواك
انت اللي باقي معاك

الناس بتركب قطر وانت ف قطر
مش كل شيء نعرف نقوله في سطر
مش كل حاجة بيتوصف تحلى
وعشان كده:

«الكتز في الرحلة»

فيه حاجات كتير عن قرب مش حلوة
أول ما تبعد عنها بتغريك
دي طبيعة بشرية..

مش عيب نظرف عنيك
كل اللي باقي عليك.. انك تعيش هادي
متقبل الموضوع..

خيطة الزمن رايع مافيهش رجوع ..
 من مرة واحدة .. على بوء واحد كلنا بنشرب
 كاس الحياة والناس
 وتعاقب الأحداث
 الفرق في الإحساس
 والقلب لما يميل
 وعشان كده مش كلنا
 بنهتم بالتفاصيل !
 وعشان كده مش كلنا شعرا
 أو فنانين ..

أو مهووسين بالسيما والأفلام
 وعشان كده فيه ناس بتعرف
 عادي يعني تنام

من غير ما تتأمل في السقف كام ساعة
 أو تعمل الأيام والحظ شاعة
 وعشان كده كلنا بنعاني يا جماعة
 علشان فيه ناس نفسها ..
 ناس تانية تفهم

حبهم مثلاً .. للوحدة

والقهوة

والضلمة آخر الليل

تفاصيل يتفرق للأسف لكن

مش كلنا بنهتم بالتفاصيل

على قد ما أنام

في الدنيا حاجات ما بنفهمهاش ..
غير لما بتحصل قدامنا
أيامنا بتسرق أيامنا
والوقت رهان ..

وأنا مش خسران
أنا لسه بقاوح وبكمل
متحمل تعب الأيام
أحياناً أروح في النوم أسبوع
أحياناً بفشل إني أنام
وساعات بحلم ان أنا بغرق
وساعات بجري ..

وساعات محلمش
على قد ما أنام .. دايمًا حاسس
ان أنا مبنامش

«محتاج لصديق»

أنا مش زعلان..
أنا واخد جنب
علشان مش عايز أحس بذنب
ولا عايز أحس بياني ثقيل
على ناس حييتهم من قلبي
أنا مش سلبي
أنا بس فهمت الوضع عشان
علاقتنا بقت مش زي زمان
قلت بحبكوا.. قولتوا احنا كمان
مع ذلك موقفتوش جنبي
يا صحابي يا عشرة عمر طويل
أنا لسه صاحبكم ولا خلاص؟!
من كتر ما شفت من الأيام
مبقتش أتعلق بالأشخاص
مبقتش بآمن بالسلامات

ولا بالعلامات ولا بالأحضان
 ولا باللمة
 مبحثش بآمن غير بالناس المهتمة
 الناس اللي بتدرك خوفي..
 فتطمئن قلبي وتسمعني
 محتاج في حياتي لناس مش ناوية تودعني
 محتاج أصحاب صاحب فعلا
 مش ناس ع القهوة وفي الجامعة
 محتاج لصديق يقاسمني الضحكة أو الدمعة
 محتاج صاحب ينفع شمعة..
 عنده استعداد..
 يفضل في النار علشان يوهب لصديقه النور
 عنده استعداد..
 لما أتعب نفسياً مثلاً
 يعمل دكتور
 مش شخص ممثل داخل فيلمي وواحد دور
 محتاج لصديق..
 يبقى اللي بفضفض وياه في الحزن

ييقالي في وقت الغربة الحظن
ييقالي في وقت ما أتوه مينا
علشان مركبي تعرف ترسي
أنا عشت أكسر ضهري عشانكم
ومحدث جه زق الكرسي !

لو عندك وقت

لو عندك وقت
 أحكيك عني حاجات مش عارف أقولها لحد
 أنا كل ما بمشي طريق بلاقيه
 في نهايته اتسد
 ياه ع الأيام..
 دي المرة الكام اللي أتعلق
 من روعي ف خيط يطلع مقطوع
 من امتي الدنيا بقت بتطبطب
 ع الموجهوع
 أنا شخص مريض..
 ومصاب بحنين لسنين فاتوا
 محبوس في دواير ناس ماتوا
 بيشوف خيالات جوا الأوضة
 ويسمع ناس مش موجودة
 وف قلبه زحام وعياط وكلام

أنا شخص مريض ..

يتمنى أنام

يتمنى أستمتع بالتفاصيل ..

كوباية الشاي

صوت العصافير في الفجرية

تفاصيل تتعاش زي ما هي

ريحة البترين ..

ريحة البويا

بيتنا اللي بحسه شبه أمي

ضحكة أبويا

.. صوت المطرة

العيش السخن عشان دايمًا بيكون أطرى

القعدة قصاد شباك مفتوح

طلعتنا الساحل أو مطروح

تفاصيل طعمها عمره ما بيروح

لو عدت حتى عليه فترة

أنا شخص مريض ..

إحساسي الزايد بالأشياء

خلاني أشتاق ..

لحاجات راحت مش راجعة خلاص
 خلاني اتعلق بالأشخاص ..
 خلاني بفارق وأنا مقطوع
 من شجرة شوق ..
 خلاني بقيت عايش مخنوق ..
 متكف وإرادتي هزيلة
 فيها ايه لو كنت بدون قلبي ..
 مش كات هتكون دنيا جميلة ؟!
 مش كنت هكون مرتاح أكثر والدنيا تمام
 أحسن مانا ماشي بدوس على ناس
 زي الألغام
 الدنيا بتصعب على اللي بي فهم ويركز ..
 ويبص لأبسط تفاصيلها ..
 وأنا شخص مريض محتاج واحدة
 تسمعني ف وقت ما هحكيها

العالم لسه مكان ضيق

العالم لسه «مكان ضيق»..
والناس زحاه
وأنا فعلاً مبقتش مُهياً..
ولا قادر على أي حياة
أنا عندي رُهاب..
بمسك في الناس علشان طيب..
وعشان طيب دايمًا بتساب
بتوتر جدًا م الزحمة..
وبعض شفايفي وأهز ف رجلي وباتعصب
من غير أسباب
إنسان يومياً بيقاوح..
وبعشم نفسي انها فترة حزن وهتزول..
وأنا كل ما أقول هتعدي خلاص
بلاقيها تطول
بطلت أقول..

بطلت أرسم ف سيناريو حياتي الي هعيشها ..
 بطلت أتخيل قبل ما أنام
 بطلت أخطط حتى ان كان ساعتين قدام
 العالم بقى مسرح هزلي ..
 من بعد ما كان مسرح أحلام!
 كان نفسي ف بيت ..
 بلكونته تكون شايفة جناين
 دلوقتي الشارع مش باين
 من كتر ما زرعوا الأرض أبراج ..
 أصبحنا في عالم مأساوي ..
 عمال بيعبي الناس في ادراج
 أنا مش مختل ..
 أنا بس مصاب بخيال واسع .. و
 بقلب عجوز
 الدنيا حظوظ ..
 وأنا دايمًا بوصل للحاجة ..
 الي احتاجتها و اتمنيها
 لكن دايمًا بوصل مرهق ..
 تعبان م السكة الي مشيتها!

مش عارف أستمتع بيها..

مش حاسس خالص بقيمتها

أنا مش مستاء..

طول عمري بحاول أتأقلم..

وأتنازل..

وأزرع..

ما حصدش

وان كنت أذيت حد ف مرة

أكيد ما قصدش

أنا طيب..

مش طيب جداً..

وبحط حدود للناس أوقات..

وبرد ساعات ببرود جايز

كل الموضوع ان أنا عايز.. فترة راحة

وإعادة تأهيل نفسية

الناس مبقوش وحشين فجأة

الناس على طول زي ما هي

«العيب فيا»..

من كتر ضغوطي بقيت بتعصب بسهولة..

ودخلت دواير مقفولة
مخرجتش منها ومش هخرج
غير لما أرتاح..
هو الواحد لو كان عبوس ف كابوس
هياقي ازاي مفتاح
غير انه يفوق..
غير إنه يشوف الناس من فوق
ويحس ان الدنيا بسيطة..
وان المواضيع كلها تافهة
وانها هتعددي وسحر الوقت هبيجي ف يوم يعمل مفعول
وساعتها هقول
«كانت أيام صعبة حقيقي»..
لكن عدت
«لله الحمد إنها أصلا عدت على خير»
وساعتها يجوز
يمكن لو مرة ف عمري بحاله
أنام من غير حيرة وتفكير..
كل اللي بيحصل مش محتاج ولا أي علاج
غير ان الواحد باله يطول..

وساعتها عيونك مش هتشوف
ولا باب مقفول
والوضع هيتحسن تاني..
والدنيا هتيجي ف يوم تحلى..
أرجوك حاول
حاول تاني
حاول تستمتع بالرحلة

بعد الثلاثين

أنا مش بكذب ..
 ولا حتى بحاول أتجمل
 أنا واقف في النص لو حدي
 لا أنا برجع
 ولا عارف أكمل
 أنا داخل ع الثلاثين تايه
 مش قادر أصدق اني كبرت خلاص وبقيت
 من صاحب لعبة
 لصاحب بيت ..
 من طفل بيجري ورا الكورة ..
 إلى شخص بيجري ورا الأيام
 من طفل ينام بعد المغرب
 إلى طفل كبير مبقاش ينام ..
 أنا مش بكذب
 أنا بس خلاص مش لاقى طريق

الدنيا بقت زي هدومي
كل ما بكبر كل ما بتضيق
محتاج لعلاج ميكونش نصايح متعادة..
محتاج جرعة فرحة زيادة..
محتاج أصحاب
نفس صحابي
قبل الأيام ما تغيرنا
أصحابي اللي في كل صورنا
قبل ما نكبر
ونتوه من بعض
أو قبل ما نفهم ايه الدنيا
محتاج طلعة مصيف تانية
درس في ثانوي
قعدة قهوة
والله بنكبر على سهوة..
أنا فاكر كل اللي بقوله..
وكأنه امبارح.. أو دلوقت
محتاج أرجع سنتين بالوقت
وأشبع من كل اللي أنا سبته..

الشخص بيندم تحديدأ
 أول ما بتكمل تجربته
 أول ما يحس بأنه خلاص
 سابق في طريق مفيهوش ولا REST
 وقتها هتحس انك عجزت..
 عقلك بيهنج مش مدرك حجم التغيير
 فيه حاجات عمرها ما هتظهرلك
 غير وانت كبير
 العالم ميهموش حالك..
 ولا عمر الناس هتقول مالك
 ولا حد هيتكلم عنك ويقول معذور
 هيجيلك وقت تروح شغلك
 ان شالله ان كان قلبك مكسور
 تضحك للناس وبُكاك محبوس
 «كل ده علشان محتاج لفلوس»
 حجم التزاماتك
 فواتيرك
 ومحدث هيسدد غيرك
 ودي حاجة مسيرك تعرفها.

فيه حاجات الوقت بيكشفها
وما دام مكتوبلك عمر تعيش
هتبان بشو يش
وكأنك ماشي في شبورة..
وعشان يكمل شكل الصورة
لازم تمشي بنفس المنوال
ولا تيجي يمين
ولا تيجي شمال
الدنيا هتمشي وهتكمل..
طول مانت بتضغط ع البدال
العمر سباق تحصيل حاصل..
ومفيش فاصل
ومفيش أجازات
هتجيب أيام الماضي منين
لو عمرك فات؟!
كل اللي ف ايدك تستثمر
وقتك علشان ميرو حش هدر
ومُسِير؟.. آه
ومُخَيَّر؟.. آه

وما بين الاثنين
أسباب وقدر
تجوز ولا متجاوزش ١٩
هتخلف ليه ١٩
وهتقبض كام ١٩..
بعد الثلاثين سقف الأحلام..
يتحول من ضخم لعادي
تحلم بالستر وبالصححة..
وبيوم بيعدي عليك هادي
بتبص لكل اللي فإيدك..
وتحس بقيمته الفعلية.
بعد الثلاثين
أو قبل الثلاثين بشوية..
بعد ما تتخرج وتعافر
بين قاعد أو بين هتسافر
وتلاقي صحابك يتعدوا
على كف الإيد..
وتحس ان انت بقيت فعلاً
بمزاجك أو غصب عنك

أصبحت وحيداً ..

أصبحت في معركتك واقف

مضطرب تواجه وتعاني

وقتها صدقني بتحول

من شخصك إلى واحد ثاني

تعلق بأبوك وبأهلك

وتحس بعظمة أفعالهم

أول ما تشوف ابنك بتشوف

كان حبك إيه بالنسبأهم ..

وعنيك بتشوف الشيء مكشوف

وساعتها كأن قلبك بيلين

ودي كل مشاكلك في الغالب

قبل وأثناء سن الثلاثين

مليش في الناس

فلان والاسم يفرق إيه
 ما دام القلب فيه نغزة
 وإيه الفائدة م الأسماء
 وإيه المغزى؟
 ما دام القلب هو السر
 والـ «بار كود»
 هي فرق إيه محمد يعني عن محمود
 فيه ناس بتقول:
 لكل فلان نصيب
 من اسم يتسماه..
 وأنا اللي بقول لكل فلان نصيب
 من ترتيبات الله
 هقولك إيه
 غير ان حياتي مش ماشية
 وإني غريق..

لا لاقى البر ولا عارف طريق لرجوع
 وإني جريت في سكة آخرها خيط مقطوع
 وإني لو حدي في الدنيا
 ولو سألوني عن نفسي
 بحاول أغير الموضوع.
 صحابي كثير..

لكن فعلاً مليش اصحاب
 مليش في الناس..

بحاول بس أجاري الوقت والأحداث
 بحس براحة في العزلة
 وبعرف نفسي وأنا قاعد قصاص البحر..
 بحب الفن

والمزيكا

والسيما..

مليش في الرغي في التليفون
 ولبس أي ماركة ولون
 وبعشق كل شيء غامق
 وريحة البن والأسيتون

ودايًا أحط شاي ع النار لكن بنسائه

ودائماً بنسى مفاتيحي ف مكان ما
 ودائماً بنسى أسماء ناس ..
 لكن ما انساك وشوش وكلام
 ودائماً عيني بتغمض
 وقلبي لسه مش بيتام
 ولسه بزق في الأيام ..
 وكل طموحي يتلخص
 في إني نفسي أعيش في سلام
 ببص لنفسي وأنا برقص على السلم
 لا طایل أرض
 ولا لامس سما بإيدي
 بحس ان الزمن نحات
 إيديه رسمتلي تجاعيدي
 ساعات فيه طفل جوايا ..
 يشبط في الهزار واللعب
 وينفخ للعيال بلالين
 ساعات بلاقيني وسط الرسم والتلوين
 وبشعر بانيساط غامر
 ف وقت ما دنيتي بتفضي

أو أقرا كتاب
 أو أكتب شعر عن كل اللي قال هفضل
 ولكن غاب..
 بيع للناس أمل كذاب
 وأصبر نفسي وسطهم
 وأقول معلش بكرة تهون
 وأقول لو ربنا رايد
 يقول للفرح كن هيكون
 أكيد في الجاي شيء يستاهل اني أصبر
 وأستنى
 أكيد بكرة هيبقى زي ما بتمنى
 بحب أسمع
 ودايمًا بشتري م الناس
 وأصدقهم بدون تخوين.
 بآمن بالصدق جدًا
 ولغة العين
 ومؤمن إننا في دايرة
 إذا لفت هرد الدين
 ومؤمن إن فيه حاجة تُسمى الحب من نظرة

وان في فرحة منتظرة..
وان الدنيا فيها شراكة حتمية
وفيه احنا
مفيش هو
مفيش هي..

ومؤمن بالحنين برضو..
وأحسن رحلة للماضي
بتيجي في شكل أغنية
بحب أتمشى بعد الفجر في الشارع..
ودايماً أنام عشان أهرب
ودايماً أقوم وأنا مقبوض
وبحلم اني متعلق

بشيء موجود ومش موجود
بحسن كثير

باني بقيت مجرد لمبة سهارى
لا أنا مطفي

ولا منور

مليش ولا صورة مع أبويا
ومش من عادتي أتصور

ساعات أفرح
وأحس بياني طُلت نجوم مطالهاش حد..
ولما أحزن

يبقى الحزن حزن بجد
وبتوقع أقل عشان

محسش انها بتضيق

وبشبع بس لما أشعر

بياني ساعدت حد في شيء

بحارب

حرب مش بالمعنى بس أهى حرب.

بخاف من كل شيء يحمل مُسمى القرب..

بخاف من فكرة اني بخاف

وبكره كل شيء لو جاف

وبعشق كل سهل بسيط

وبعشق كل شيء شفاف

كلام الدنيا مبيخلصش منها حكيت

ومنها الوقت فات ونسيت..

هتفضل في حاجات عايشة

وحكايات ملهمة وتفاصيل..

أكيد في الدنيا شيء ينفع يخلي الصبر طعمه جميل
يعشمننا في حياة سهلة..
وفي ناس أبسط
ودنيا تمام..
فيوصل قلبي لطموحه
وأعيش في سلام



قبل ما يفوتنا الحنين



ساحر الكتب

كإني مفارقك امبارح

قالولك اني مش فاكرك ..

وشوقت حياتي في غيابك ..

وعشت وقلبي لا اتأثر ..

ولا اتكسر ولا اتهزيت

ولا اهتميت ولا دورت

قالولك ان أنا اتغيرت

وقلبي اتعلم القسوة ..

وهونتي عليا ونسيتك

قالولك اني حبيتك ..

لكن ده زمان ..

وكان يا مكان

خلاص حدوة وانقضت

مجرد فترة واتقضت

وإن حكايتي وياكي

مجرد يعني لعب عيال

قالوك كل شيء ممكن
 في يوم بعد الفراق يتقال
 وقالوا ياني وياني ..
 وعادوا كلامهم الجارح
 وأنا والله مانستكيش ..
 كأني مفارقك امبارح
 ده أنا والله بفتكر ك ..
 في شكلي ان عيني يوم بصت على مراية
 كأنك سايبه شيء متخبي جوايا
 يشوفك ضلي في الشارع إذا اتمشيت
 وبسمع صوتي مع صوتك إذا غنيت
 أنا الطفل اللي في غيابك ..
 خرج مرجعش تاني البيت
 بقيت ضايع ..
 كأني ف أرض مش أرضي
 كأني في دنيا غير الدنيا مش شايف
 بقيت خايف ..
 لأول مرة أخاف بالشكل ده يعني
 وأحس بأن أبسط شيء بيوجعني

وأحس بإني مش عارف..

مكان ينفع أشوفك فيه

ورقمك حتى مش مسموح لي أرن عليه

غريب عنك..

وقلبي حزين..

لا لاقني حد يسمعني

ولا يشاركني في المأساة

مسلم كل شيء لله

مُحاط ببواقلي أيامك..

بتفاصيلك..

بريحتك وانتي حضناني..

بصوت نفسك..

بمسكة ايدك الباردة..

بضحكة لقيتها على وشك..

فوقت ما جبتلك وردة

بزعلك لما نتخانق..

بدال المرة ميت مرة

بقلقك وقت ما موبايلي

بيفصل شحن وأنا به

حاجات ساذجة ..
 حاجات يمكن تكون تافهة ف نظر غيري
 لكن والله فيه تفاصيل
 بتفضل شاغلة تفكيري
 مواقف كنا بنعيشها بقلوب بيضا ..
 بنضحك والحياة سهلة
 حاجات مكانتش مستاهلة ..
 نفارق بعض في الآخر
 ساعات يبقى القدر ساخر ..
 ويسرق كحكة من ايد اليتيم ف العيد ..
 ويقلب فرحة العشمان ..
 وجع ورحيل وهدية حيل وكسرة وخوف
 يا ريت الدنيا م الأول ..
 بتلعب بيناع المكشوف
 بدال ما نعاني ونهاقي ..
 ونخسر بعضنا بغباء
 بدال ما ندوب من الأحزان ..
 وننحل روحنا م الأشواق
 بعدتي ولسه مبعديش ..

عن الدنيا اللي فيها بعيش
 قوليلهم اني منستكيش..
 وفأكر ك رغم أي فراق
 وهفتكر ك مادام عايش..
 وهفضل للأبد بشتاق
 هكلم عنك الأشياء..
 وهحكي لكل كائن حي
 بآنك بنت ملهاش زي..
 قوليلهم مهما راح..
 راجع..
 هيتأخر و لكن جي
 قوليلهم حبني جدا..
 وبكره يحبني أكثر..
 وبعده يحبني أكثر كمان و كمان
 قوليلهم اني هرجعلك..
 ونرجع تاني زي زمان

وربنا فجأه عوضنا

بحبك والكلام لو سهل ..
 ف أنا اتعودت ع الأفعال
 بحبك وانت عيلة وأهل
 وعيشة أمان وراحة بال
 يا أطيب بنت في العالم
 مفيش منك خلاص تاني
 يا أجدع صاحبة حبيتها
 وأكثر واحدة فهماني
 قصادك ببقى طفل كبير
 بشوفك دنيتي بتحلى
 فيه ناس لو جينا نوصفهم
 نقول «الكثر في الرحلة»
 مشينا السكة وياهم
 بدون ما نخاف وغمضنا

حبايب وقت ما بنعشق
 صحاب لو جينا فضفضنا
 نقول مثلاً تعبنا كثير ..
 من الوحدة ومن التفكير
 مشوفناش قبل منهم خير
 وربنا فجأة عوضنا
 جميل عوض الكريم لما ..
 بيجي ويجبر الخاطر
 وست الحسن في الآخر ..
 تكون من قسمة الشاطر
 يا صاحبة عمري ببساطتك
 وأفورتك
 بدون أسباب أنا اختارتك ..
 بتكشirtك .. وتبويذك ..
 وزعلك مني لو أغيظك ..
 وجودك جنبي وأنا تايه
 وقوفك جنبي وأنا موجوع
 وزعلي ف وقت ما تبالغني ..
 وفجأة تكبري الموضوع

هدوءك وانتى بنتقاشيني
فين حقك وفين حقي ..
وذوقك وانتى واقفة ما بين
هدوم هلبسها بتنقي
سكوتك لما تتكسفي
وقلقك لما أغيب كام ساعة من يومك
براءتك وانتى جاية وعازية مني فلوس
وصوتك وانتى صاحبة الصبح من نومك
حاجات من كتر بساطتها ..
بتعمل للحياة معنى
كفاية ان احنا في الآخر ..
في بيت واحد مجمعنا

جميله بكل شئ فيكي

جميلة بكل شيء فيكي
بسيطة كأنك الطفلة
اللي بتعدي الطريق بشويش
وهادية كأنك الشمس
اللي وقت غروب على الكورنيش
بريئة كأنك البنت اللي بتططب
على صاحبها
وحلوة كأنك الدنيا اللي فيها عيوني
مبتبكيش
كأن أنا وانتى توأم روح
كأنك باب فرح مفتوح
وبيت بيطل على الجنة
كأن أنا وانتى حدوتة
بيحكوها البشر عنا
يا عمري اللي ابتدى صدفة

يا حلم حياقي وطموحي
 لقيت حضنك مكان أدنى
 من البرد الي صاب روحي
 لقيتك دار.. ودنيا عمار
 وسكة أنا فيها بتمشى
 كأني غريق في بحر الخوف
 وإيدك كانت القشة
 قابلت الدنيا في عيونك
 وشوفت الفرق في العلاقات
 بين الناس الي عشرة عمر
 وبين ناس حبههم «فترات»
 لأول مرة ألاقي الحب
 زي ما شوفته في الأفلام
 لأول مرة أحس بياني بعرف أعيش
 وقادر أنام
 لأول مرة لو سألوني مالك
 أرد عادي تمام
 بدون ما أكذب
 عشان كاتم في عيني عياط

يا حلوة وكل يوم تحلو
حتى وهي عندها برد
يا بنت إديها لو لمست إيديا.. الدنيا تطرح ورد
مرايتك كل يوم بتقول
بانك حلوة شكل وروح
جمال كل البشر لو زال
جمالك انتي مش هيروح
كأنك عشق من نوع خاص
حياة وارتحت فيها خلاص
يا بنت في منتهى الإخلاص
معاها لقيتني مش مجروح
بحبك وانت عارفة بدون ما أقولها لك
لكن لازم أقولها لك بكل وضوح
بحبك.. قافلة قلبك ليه
ده قلبي من زمان مفتوح

التلج داب

معرفش ليه ..
كل الأماكن ضيقة الليلة
كل المدن مؤلمة ..
ومضلمة وباردة
وأنا إيه ف إيدي .. غير إيديكي انتي
مدي إيديكي ف روعي وازرعي وردة
أنا قلبي تاه ..
عيل في مولد ضحكك
سارح .. عمال بقابل بكرة في امبارح
طيفك مشي ..
فلقيتني ماشي وراه
درويش بقول «الله» ..
الله جميل ..
وانتي الجمال .. سبحانه
خلى عنيك مفتاح الحياة

أول ما بس ببصلك .. بلاقيني طرت لفوق أوي
 عند النجوم .. فوق في السما
 يمكن مطولهاش إنما .. أشعر بقلبي بينتشي
 انا قلبي عندك «فتشي» ..
 هتلاقي نفسك ساكنة
 فيا بوضع يد ..
 م المستحيل
 لو جيتي قلبي تلاقى غيرك أي حد
 م المستحيل ..
 لو تلمسيني أفضل كده
 التلج داب ..
 والحرب خلصت من زمان ..
 حتى الزمن
 غير حاجات في حاجات كتير
 إلا انتي حلوة وطيبة وقلبك كبير
 معرفش ليه الدنيا رابطانا بضمير
 وكأنها خالفة اتنا منسبش بعض
 معرفش وعد الحر دين
 وان كان ده دين ؟! .. أعتبره وعد

مقصدهش حاجة أنا بس شفت من الحياة
نهايات حزينة..

لناس كثير دفعوا التمن

أصل الزمن علمني..

أخاف أوي م الزمن

وأنا جيت خلاص ورميت بياضي مقدما

لو عايزة عمري

خلاص خديه من غير شروط

لكن يا ريت جنبك يفوت.. وتكوني جنبي

وباب علينا بيتفضل

ونعيش لآخر عمر بعض بنحتفل

ونشوف لأول مرة حلو بيكتمل

من غير ما ييجي فراقنا يسبق حلمنا

أو ييجي بكرة فنصحى من حلم احنا فيه

وأنا أهو بقيت خايف أوي.. معرفش ليه

لو كنا جيران

لو كنا جيران ..
 وحياتنا بسيطة ومعتادة
 الدنيا بلون أزرق سادة
 اثنين .. عايشين في سلام نفسي
 اثنين عايشين زي ما تيجي
 أحلامنا بتكبر تدريجي
 من غير ما نحس اننا ضايعين
 في حياة جافة ..
 من غير ما نلاقي اننا ماشيين
 من غير دفعة
 من غير ما نتوه جوا الأيام
 ونقوم وننام
 نفسنا نتقابل .. مش عارفين
 من غير ما يكون الليل سكاكين
 أو أكون مسكين

محتاجلك لكن
 مش طايلك
 حضنك موصليش في رسايلك
 ولا عارف أقابلك ولا شايف
 حل لمسافات بيني وبينك
 كان نفسي أضملك وأنا خايف
 كان نفسي تكون عيني ف عينك
 من غير تعقيد..
 من غير مسافات واخذانا بعيد
 شباكي قصاد.. شباك بيتك
 أفتح شباكي
 تكوني الشمس اللي تنور
 أفتحلك قلبي
 تكوني العمر اللي بيتعاش
 أجمل كلمة بتتقال في الحب..
 هي اللي بنيجي نقولها لبعض فمنقولهاش
 لو كنا جيران
 في حياة أهدى وعالم دافي
 الشتا لو جه

يُمسح أحزاننا بأستيكة

تتحول فجأة لمزيكا

ونتوه مع صوت فيروز تاني

أكتب جوابات على عنوانك

تبعتي جوابات على عنواني

لو كنا جيران

كان ممكن أحبك لمجرد

إن أنا مش شايف شيء غيرك

كان ممكن أشوفك دلوقتي

لمجرد إنك واحشاني

وشايفك دنيا في الدنيا

بحبك والي متضايق
 مسير ربك في يوم يهديه
 بحبك اه ومش هعرف
 بحبك قد ايه أو ليه
 عيون الناس إذا بصت
 بدال المرة ميت مرة
 أكيد هتبص من برة
 لا هتدقق ولا تميز
 طبعي اني أبقى متحيز
 وشايفك دنيا في الدنيا..
 وشايف حبك الأملة
 وشايفك حتى لو ناقصك حاجات
 «كاملة»

ورمشك عندي يسوى الدنيا وما فيها
 طبعي الناس دي متشوفكيش

عشان بتبص بعينها
ياست الناس
وتاج راسي
ونعمة ربنا ورضاه
مفيش راجل
هيبقى عظيم
بدون ما تكون في ست وراه
بتمسك إيده لما يخاف
وتسند ظهره لو ميل
يكون راجل قصاد الناس
ويبقى في حضنها عيل
مجرد طفل ببراءته
وضعفه ووحده وخوفه
يرمي لكتفها ظروفه
تزق اليوم معاه وتعيش
تقاسمه الضعف والقوة
ولو سألوها عن معنى الحياة مثلاً
تقول «هو»

تشوفه الأب

ضهر في ضهرها لو مال

تشوفه الابن.. لو مجابتش لسه عيال

تشوفه الأخ لو حبت تقول حاجة

فيبقى فاهمها لو ملقتش شيء يتقال

عموماً يعني لو هقدر

هجييلك كل يوم نجمة

وهعمل كل يوم تمثال

وأقولك «انك العالم».. وأنا المحتاج لكوكب ثاني

أهرب فيه

وأقولك انك الأيام

وعمر أنا وانت هنقضيه

وأقولك انك الونس اللي راحتني معاه

وأقولك انك الشيء اللي بحلم بيه

وأقولك اني كنت بتوه

لقيتك سكة فمشيتك

وأقولك إن لو ضاقت

حياتك بيكي فأنا بيتك

وأقولك اني حبيتك
ومش عارف بحبك ليه
بحبك واللي مش عاجبه
مسير ربك في يوم يهديه

* * *

أغنيه فرنسيه حزينه

مش كل مكان في الكون هيساع
ولا كل قلوب الناس تنفع
تبقالك أرض عشان تدخل تزرع وردة
الوقت بطيء
دقات الساعة ساعات بتكون سكاكين باردة
تقتل على مهل
الليل مش سهل
الليل بيفوت قطر مهدي..
فيه حاجات مش دايمًا بتعدي
فيه حاجات جوانا بتتبقى
وتسيينا ما بين.. أيوه ولأه
أرجعلك؟! .. لأ..
أرجعلك.. آه
وكانى بحبك بالإكراه

مش عارف خايف ولا خلاص

مش عايز أرجع من ثاني

أنا كل ما برجعلك بندم

مع ذلك في البعد بعاني

في جرح ف قلبي ملوش عنوان

غير إنك ماشية وسيباني

والدنيا بتو جمع في غيابك

القصة بقت أكبر بكثير

من واحد سبتيه أو سابك

القصة بقت ان أنا عايش

لكن مش عايش بالمعنى

كان نفسي أحس بإن الكون

قادر يتحمل أو جاعنا

أو حتى أحس ان الدنيا

مش قاسية علينا ومش جاحدة

وان الأيام مش هتفرق

بين واحد لو حبيب واحدة

وان أنا مش هفضل طول عمري
متعلق بين حزني وحيري
وأتنقل من وحدة لو وحدة
وان أنا مش هقضي حياقي تعيش
محبوس في حنيني لناس راحوا
الواحد من كتر جراحه
مبقاش بيعد ولا بيزعل
ولا يشغل باله بمين مجروح أو مين جارح
والله بقالي كثير عايش
مش عارف بكره من امبارح
أيام بتعدي مبحسبهاش
وأنا لسه في آخر طرايبزه
قاعد متخدر وبحاول
أخرج من الوضع اللي أنا فيه
الراجل منا لو يزعل
كل اللي ف إيده انه بيقعد
على أي كافي

ييجي الجرسون
 وأنا إيدي تشاور.. هات قهوة
 أشرب منساش.. أشرب أتذكر.. وأفكر
 والجو العام عادي وهادي
 بس أنا جوايا صراع أكبر
 من أزمة روسيا وأمريكا
 تفتحهم المشهد مزيكا..
 «أغنيه فرنسية حزينة.. مفهمتش كلماتها لكني
 حسيت وأنا قاعد بسمعها
 انك بتضيعي خلاص مني»
 وان أنا بشبه تشرين ف بكاه
 وان أنا مش قادر ع النسيان
 بسمع وفي إيدي كتاب بقراه
 وبضيع وقتي مع الأحزان
 ويكلم نفسي وبتأمل
 في ماضينا وفي الوضع الحالي
 وأنا كل ما أقول مش هفتكر

بلاقيكي أوام تيجي في بالي
والحق ان أنا فاكرك جداً
حييتك وكرهتك جداً
مش قادر أقول عنك أبداً
موضوع انتهى بالنسبالي

* * *

وكأنك ماضي ملوش قيمه

لو فاكرة ان أنا هر جعلك بعد كلام خايب
وهنصفى لبعض ونرجع من تاني حبايب
تبقى ف غيبوبة

وفوقي عشان زمنك ولى
الشخص اللي اتمسك بيكي ..
دلوقتي بيعرف يتخلى

هي اعتذاراتك هتصلح قلبي اللي انداس ؟!
يا خسارة سيرتنا بقت حدوة لكل الناس
يا خسارة العشرة اللي بتتهان
وقت النهايات !!
الناس بتبان ..

وبتعرف مين حبك فعلاً
وبتعرف مين كان لابس وش
من امتى جروحنا بتتداوى
بكلمة معلىش ؟!

أسفك بايخ
 زي أما تروح تحضن ميت
 بعد ما تقتله بإيديك الاتنين
 زي أما تحيب نضارة لحد جرححت له عين
 خدي أسفك وامشي بلاش خايلة
 وانسي اللي ما بينك وما بيني
 دلوقتي انتي اللي خسرتيني
 أما أنا فكسبت
 وأنا طالع من حربك عايش
 اتسابت وسبت
 جرحي وجرحك
 ومحدث ظالم أو مظلوم
 والماضي في كوم
 والجاي في كوم
 وخلاص كات صفحة قفلناها..
 بزيادة كلام ملهوش داعي
 ولو انتي دراعي اللي واجعني..
 فأنا هقطع من بكرة دراعي
 ولا انتي خلاص فكرتي ان أنا هرجع راع

وهقول محتاجلك متسبنيش
 انني رجعتيلي عشان في غيابك هقدر أعيش
 ومهانس عليكى انا أنساكي
 وأتحرر من سجن هواكي
 كل اللي فرق بس معاكي..
 انك متسا به ومكسورة
 وقلبك مخضوض
 ازاي سيبتك
 ازاي متحمل خوف غيبتك
 ازاي أنا دوستك وكأنك عقب سيجارة
 وازاي هونتي..
 وازاي دلوقتي بجيب سيرتك ويقول كنتي
 وكأنك ماضي ملوش قيمة..
 أو غيمة وعدت في سمايا
 دلوقتي أنا راضي أعيش بعدك
 لو حتى مفيش حد معايا
 أصلك مش نعمة وأنا اتبترت
 فزالت من وشي ببتري
 وأنا عمري ما هضعف قدامك

وهقول استني عشان خاطري
ان بعت ببيع بضمير مرتاح
وأنا قلبي بقفل ملوش مفتاح
أصل أنا مش شخص رخيص ومتاح
قطرك دلوقتي مهوش قطري
وطريقك غير اللي أنا بمشييه..
وان كان ع الماضي خلاص نسيناه
وان كان ع الجرح قدرنا عليه..

زي القمر

زي القمر والقمر
 ليه الشرف والله..
 وقت أما أقول يشبهك
 في النور أو الطلة
 انتي الجمال الخام
 وحلاوة الأحلام
 بتعلميني الأمل
 لو ضاقت الأيام
 طفلة وف قلبك أم.. لو تسألي مالي
 على كتفي بتطبطي
 لو ضاق في يوم حالي
 لو سبت كل الناس
 ميسيش يوم إيدك
 لو سابني كل البشر

فانتى الي باقيالي
 انتى الوطن والوطن
 مش شرط يبقى مكان
 انتى البلد والسكن
 والأرض
 والعنوان.
 آخر وسيلة حياة
 فى عالم الفوضى
 آخر أميرة فرح على كوكب الأحران
 أول ما أقول «وحشاني»..
 وتردي وانت كمان
 بيدأ أشوف دنيتي
 من تاني بالألوان.
 انتى الي لو تزعلي
 الدنيا بتضلم
 وانتى الي لو تضحكي
 أفرح إذا زعلان..

زي القمر والقمر

ليه الشرف علشان

بنقول عليه يشبهك في النور أو الطلة

وانتي القمر شافك قالك:

ما شاء الله

«ما ترجعيليش»..

غباء الحب صورلي ..
 بإنك طوق نجاة و حياة
 مراهق كنت مش عارف ..
 بإنك منتهى المآسة
 أنا الغلطان ..
 عشان حببت بكل جنون
 عجبني الشكل من بره
 فمهتمتش بالمضمون
 وقلت إيديكي مش هتسيب
 وقلت عنيكى مش هتخون ..
 طلعتي سراب ..
 يا دوب مانىكان في فاترينة
 الخداع والزيف
 فضلت كثير
 هموت علشان أقربلك

وجيت عندك لقيتك « طيف »
 - يا ريتني فضلت مش شايفك -
 ده يوم ملعون .. قابلتك فيه
 قلب عمري .. كسر ضهري
 عمل من قلبي دواسة
 وجع وزحام
 عمل من روحي بيت فاضي
 ف شتا الأيام
 عمل من ذكرياتي اكوام
 عمل من حينا حواديت
 بقت تنفع تكون أفلام
 غرورك زاد وجه الوقت الي أقولك فيه
 بيا نك ماضي متشرفش أبدًا بيه
 انا والله ما خسرتك .. عشان أزعل
 ولا أبكي عليك يوم واحد
 ولا أندم ع الي كان بينا
 مكنتش يعني في الجنة ..
 مكنتش نجمة ولا حاجة
 .. أنا الي عنيا خدعتني

وشفت ان الإزاز الماس ..

لقيتك زي كل الناس

مجرد كذب متزوق ..

وأنا اللي ضعفت ..

أنا اللي جناحي كان مكسور

وقلت معاكي بكرة هطير

وقلت انك هتبقى عليا وش الخير

فضلت أحلم ..

وأعد نجوم سما الأوهام

ليالي طويلة وأنا عايش ..

بحاول بس جنبك أعيش

متر جعيليش

بقول لاصحابي فاكراني ..

أكيد زعلانة من حاجة

يومين ومسيرها تشتاقلي

مكتتش واعى وف عقلي

مكتتش فاهم ان خلاص

نهاية القصة حتمية

وشفتك ماسكة إيد غيري

وقلت لنفسي «مش هي»
 أكيد في غلطة في الموضوع
 ضحكت وجوا عيني دموع..
 وقلت لنفسي فوق وافهم..
 عشان تعرف علاج مرضك
 وقلت لنفسي مانت عبيط..
 زرعت ف أرض مش أرضك
 ضحكت ساعتها والله..
 ضحكت بشكل هستيري
 عشان شايف خلاص حلمي
 بيتحقق بإيد غيري
 ضحكتي معاه..
 وشفيت الفرحة على وشك
 بتشبه فرحة كات بينك وكات بيني
 ده حتى اللبس ده اختارناه..
 سوا وقستيه قصاد عيني
 مكانش ناقصني غير اني
 ألاقى رسالة فيها عزومة على فرحك
 كاني في وادي وانت في وادي

مش حاسة انا بتألم
 .. معدتش طابق أتكلم
 كلامي معاك يفرق إيه
 عموماً ده النصيب برضه
 ما دمتي معاه وبتحبيه
 أكيد شبهك وتستاھليه
 غريبة الكل كان عارف ..
 وأنا؟! .. نايم على وداني
 غريبة الفرحة كات جنبني
 وأنا اللي اختارت أحزاني
 مترجعيليش عشان فعلاً ..
 معدش ما بينا شيء تاني
 ولا عايز أشوف وشك ..
 ولا أفكرك ولا أرجعلك
 خلاص .. مبقتش أنفعلك
 وأهو انتي كمان متنفعليش!
 مترجعيليش

مين اللي واقفة قصادي دلوقتي؟!
 أصبحتي واحدة عادية معرفهاش

بعاملها زي الغرب لو شفتها

جرحتني وجرحتها..

نقدر نقول خالصين

موضوع خلاص واتقفل

.. مش هفتحه في قعدات..

ولا هحكى عنه لحد

كان باب وجع واتسد

خدت الحياة بهزار..

علشان مموتش حزين

راجل جدع واتوجع..

عادي احنا بني آدمين

لو حتى قلبي اتكسر

والجرح سايب أثر

أنا برضه مش من حجر

حتى الحجر بيلين..

أنا بس بعرف أداري أحزاني

بعرف أخبي عن الصحاب وحدثي

رغم اني وسطهم

بعرف أكلم نفسي طول الليل

وأصبر على الأوجاع ..
 ويقول مسيرها تروق
 بعرف أفارق كل شيء بهدوء
 بسمع أغاني وبتلهي في تفاصيل
 بقعد في ركن في آخر القهوة ..
 وف ودني هاند فري .. وف إيدي ولاعة
 لا ببص للساعة ..
 ولا بحسب الأيام
 دايماً عيوني تبص على قدام
 دايماً في حنة أمل ..
 جوايا مهما بشوف
 وعشان كده
 مبقتش أحس بخوف
 يمكن كبرت صحيح
 والوحدة حل مريح
 يمكن لأنني جريح
 الصدمة واخداني
 يمكن عشان طول عمري وحداني
 بس الأكيد اني

أصبحت ناضج كفاية
 في معظم الخلافات
 وبقيت بقابل كل صدمة برضا
 وبقيت بقول متعوضة..
 مكانتش ليك
 علشان تدوم ف إيديك
 انت اللي عامل قيمة للقصة
 الدنيا فيها حاجات كتير أحلى
 وبنات كتير لسه..
 وأكيد في بنت مسيرها هتقابلك
 مجروحة من قبلك..
 شايفاك دوا جروحها
 تقسم معاك روحها
 وتكون شريكك في الحياة عموماً..
 وف وحدتك مخصص
 كل اللي عدى دروس
 علشان تكون أقوى
 علشان تحس بقيمة اللي معاك..
 وعشان كده
 كان م الطبيعي انك تعيش مأساة

فيه لكل واحد منا واحدة
هي الي هتكمله
وتعيش حياتها معاه
وعشان كده اطمني..
مبقتش محتاجلك
وخلاص قدرت أعيش
لو لسه عندك كرامة
يا ريت مترجعيليش

كنت علشانك بحارب

كنت بترجى الحياة ترزقني فرحة
عشت أبوس إيد الزمن بيعت هدية..

وأما ظهرت فجأة هي
قلت دي اللي معاها راحتني
دي اللي هتقدر مساحتني..

وتفهم اني غريب شوية أو انعزالي..
دي اللي هحكى معاها وأسهر بالليالي
دي اللي لو بيعت رسالة
هبتسم وأسرح وأغني
حتى مني

زرقي م الفرحة ونصيبني
كنت بنسى الحزن كله
بيها لما تقول «حبيبي»
كنت زارع قلبي فرحة
وحلمي كان فستان وطرحة

وبيت صغير تبقى فيه ..
 الزمن لو دار يغير ألف قلب وألف حال
 والي حبوا زمان حكو لنا
 عن «دوام الحال محال»
 النهاردة بقيت قصائدك
 متهم والتهمة إني
 إيدي أضعف م النصيب ..
 الظروف كات أقوى مني
 للأسف لازم أغيب
 إيدي سابت بس قلبي
 لسه مش قادر يسيب
 كنت علشانك بحارب
 قطر شغلي وقطر عمري
 وقطر تفكيري في حياتنا ..
 كل قطر أنا وانت عشنا بتركبه مع بعض
 فاتنا

والنهاردة إيه باقيلي
 غير دموعي وذكرياتنا
 لو وجودي خلاص مضايقتك

همشي عادي
 هاخذ الأحزان في حضني
 وأقول مجاتش على الليلة دي
 بكرة هخرج من حياتك..
 وانتي هتعيشي ف غيابي
 تقفلي بابك قصادي
 بس أنا مقفلش بابي
 وأحكي عنك للأماكن والمساكن
 والمباني
 هحكى عنك للسجائر والأغاني
 هحكى اني بكيت عشانك
 واني برضه بقيت عشانك
 شخص تاني..
 الوجد طایل كرامتي..
 والرجال إيه غير كرامة؟!
 مش بقولهالك دراما..
 ومش هعيش دور الجريح
 بس لازم تبقي عارفة
 اني حبيتك صحيح.

مش هتتعاقب في حاجة..
 اللي راح راح والسلام..
 الكلام مبقاش يآثر
 لا اللي باعنا خسر دلعنا
 ولا اللي بعناه كان بيعخسر
 مش هعيد ولا أزيد وأفسر
 الكلام باين لو حده..
 وكل واحد فينا وحده
 المهم تكوني راضية
 بالنهاية المنطقية
 وأما بكرة هيسألوني عن غلطنا
 هجيبها فيا
 متخافيش حبيتي راجل
 حتى لو فارقك يصونك
 حتى لو سبتيه يحبك
 أو يحافظ ع المودة
 اعتبرتك قطر عدى
 واعتبرت الماضي رحلة
 قلت جايز بكرة يحلى..

لسه في الأيام كثير..

كله خير..

لو صحابك جابوا سيرتي وقالوا أحسن

أو عابوني

أو قالولك إن بكره الدنيا تحلوف عيوني

واني هعرف واحدة غيرك

واني هنساكي في ثواني

ردي غيبتني وقولي يمكن

قصدكم على حد تاني

ردي غيبتني وقولي عصبي

بس طيب..

كان بيهتم وقريب

قولي قاسي وغيرته تخنق..

بس لما يروق حنين..

قولي وقت الشدة لين..

كان بيتناقش معايا

وكان بيعرف ايه الحكاية..

وكان جدع ومكانش سلمي..

كان مجرد طفل متعلق بقلبي..

وكان برغم خناقنا صافي ..

وبيراضيني ويبحايطني

وكان شايطني ما بين عينيه

عمري مرة ما أهون عليه ..

وأما يسأل حد طب سبتيني ليه ؟!

قولي عادي

نصيب محدش له اختيار

والعلاقة ما بينا حلوة وداري حزنك في الهزار

وابعدي لو عايزة عادي ..

بس أنا هفضل لو حدي ..

وأقول مجتش على الليلة دي

«يا ريتني مشيت»..

محدث شافني وياها..
 في يوم غير لما قالي بلاش
 وأنا اللي حقيقي مفهمتش..
 بأن في ناس متنفعنناش
 أكيد حببت..
 وشفتك بيت
 وشفتك حلمي وطريقي لحياة أحلى
 خدعني الشهد..
 معملتش حسابي في قرصة النحلة
 وفقت لقيتني متعلق بخيط مقطوع
 مكنتش فاهم انه خلاص..
 هفارقك وانتهى الموضوع
 مكنتش فاهم اني مشيت
 في سكة آخرها ولا حاجة
 أنا اللي آمنت بسذاجة

وشفتك عكس ما شافوكي

وحبيتك وقدرتك

خسرت الكل بس عشان

زمان مرضتش بخسارتك

دافعت كثير عن القصة وقلت مبررات وشروح

أتاري الحلو في الأول هيتحول وطعمه يروح

مصدقتش بإنك «هم»

مرض وبيمشي جوا الدم

كأنك كنتي سهم اتسم

وصاب قلبي ورماء مجروح

يا عيني علينا رجالة وقلوبنا ازاز

دموعنا بتبقى على هيئة وجع مكتوم

نقع ونقوم..

عشان جدعان وميصحش

نبان مجاريح

ومن امتى الجبل يتهز

لو زادت عليه الريح

ومن امتى احنا بنميل مع الأيام؟!!

ومن امتى احنا نعد وعد أي كلام؟!!

يتبدل قلوب وظروف ..
 وينعيش الحياة ونشوف
 نفارق بس بالمعروف
 ونمشي وكل حاجة تمام
 غيابك بس سابي علامة استفهام
 وسابني في حيرة وربطني ف شجر تفكير
 صبرت كثير
 وقلت في يوم هتتغير
 وتفهم اني ليا شعور .. ومتحمل
 بقينا أنا وانت بنجمل
 ف صورة الحزن شوها
 بقيتي واحدة مش عارف
 حبيبها ولا بكرها
 ساعات بشعر ..
 بيا نك عمري وحياتي وطريقي الجاي
 ساعات بشعر ..
 بيا نك بردت مش عارف ده ليه وازاي
 بحبك بس بكره حبي ليكي عشان ..
 جعل من قلبي شيء تالف .. رخيص السعر

بقيت من كتر ما اتأملت بكتب شعر
أنا لو كنت بتعامل معاكي زي ما تستاهلي تتعاملي
مكانش ساعتها خاب أملي ..
و كنت قدرت أسيب متسابش .. وأتحمل
و كنت لو حدي ها جني وأقول خلاص
والله ما هكمل ..

تعبت ولسه مش فاهمة اني آخري اتجيب
وبكرة هتمشي وأقفل ألف باب ورا باب
وبكرة هتبقي ماضي وجرح مبحبوش
هقول للناس دي ذكرى جميلة وأنا كذاب
مفيش راجل هيرضى بانه يتهمش ..

ياهمالك ده سهل عليا مهتمش
طبيعي القصة بعد ده كله متمش
وأسيبك قبل ما اليوم ييجي وأنا أتساب
قاسيت وانتى اللي مش حاسة اني كنت بموت
وقلت لنفسي فترة حزن
بكرة تفوت
حاولت أبعد

تعبت رجعتلك تاني

رجعت ندمت معرفتش أعيش مبسوط
يا ريتي مشيت
ومعرفتش طريقك فين
ولا عرفتك ولا اتنيلت حبيتك
عشان بعدك بعيش في الدنيا زي ما رحت
زي ما جيت..
يا ريتني مشيت





فيلم اسمه إسكندرية



اسكندرية ليه (ولد وبنت)

أول مشاهد قصتك ..

مشهد حزين

أول سلام كان بالإيدين ..

كان فيه غرابة ولخبطه

وكلام ناسيه

كانت إيديك تلجاية دايرة في كفها

حضنت إيديك بإيديها فجأة كأنها

صعبان عليها اللي انت فيه ..

برفانها يومها ساب هدومها وساب أثر

في قميصك البني القماش

في حضن كان مفهوش نقاش ..

وجه اعترضها غالبكا قدامها كان

ان البكا ما يهمناش
 ليه نيكى على شيء من اللي فات!
 الحب أصلاً طول ما هو حبنا..
 طول ما هو انت وأنا
 يعمل ألوف المعجزات..
 الشاي برد جب الكلام
 وإيديكي زي الشاي بقت
 في إيديا تلج مادفانيش
 بقولك ايه ينفع نعيش؟!
 أنا كنت أفارق أبتسم
 دلوقتي أفارق أتقسم
 دلوقتي فارقة الفرقه ليه
 من قبل حتى ما أودعك..
 مع اني عمري ما هتفعلك..
 عايزك تكوني كيان وذات،
 مع ان برضو مفيش أمل
 مين اللي قال الحب يعمل معجزات!

لو كان بيعمل كان عمل ..

كلمني .. كلمني أكثر

قولي ايه اللي مسكتك!

صوتك ماليه الخوف دا ليه؟

وبيرتعش وكأنه عيل من عيال

الشارع الفاضي الحزين

ليلة في ديسمبر ..

والمطر علو الرصيف ..

اسكندرية ..

اسكندرية المؤلمة من غير حبيتي الملهمة

يا بحر مابتديش دوا ..

غير للي جاينلك سوا

واللي يحيلك دون حبيته بتوجعه

وترجعه

بجرح أكبر من اللي كان جاي يداويه

اسكندرية حلوة اه ..

لكن بدونك زيها ..

زي المداين كلها
 الحزن كان طبع الشوارع،
 والبيوت والأمكنة
 انتي هناك.. وأنا مش هنا
 الخوف حضني حضن جامد وقتها
 مقدرش أبطل خوف مقدرش..
 أنا لسه أضعف من الإزاز
 حاسبي في يوم تتعوري
 أو تكسري فيا اللي لسه مانكسرش..
 اسكندرية مكشرة
 والليل زحام..
 طعم الحياة ساقع رخام
 انسي شويه بأني خام
 ضميني أكثر من كده..
 أنا لسه خايف من يناير يبتدي
 أنا لسه مرعوب من الشتا
 دا المشي من غيرك وجع..

والمطرة من غيرك بكاء..

لو كنتي موت

أنا لسه غاوي أترمي في التهلكة

ضميني أكثر واشبعي من كل ضلع

من كل شبر..

من كل ملي بتحضنيه

اسكندرية تاني اه..

ومتسألش أنا رحت ليه؟

لسعة برد / ميامي ٤٥

آخر مشاهد قصتك...
 مشهد حزين
 آخر سلام كان بالإيديين..
 كان فيه قلق معجون بـ شوق
 وهدوء وحيرة وتنهيدات
 وسُكّات يبيجي وراه سُكّات
 البحر واقف ييكي على كُل اللي فات
 أما احنا
 كنا بنتقسم نصين
 لكن مبانش ان احنا بنعاني
 حسيت كأني وقتها فعلاً
 دلّاية فقدت نصها الثاني
 و«محطة الرمل» اللي شافت حيننا
 شافت فراقنا استغربت منّا
 «اسكندرية» خلاص بتعلن إننا

مبقاش فيه حاجة للأسف بينا

اسكندرية بتخبطك على راس ماضيك
تترف ضياع..

عمر الكلام الافتراضي بيتهى
وقت الوداع..

غابت.. وسابت وشها ف عنيك
بصيت ف عينها دخلت ف «فلاش باك»
مشهد مرض..

كنت ف المستشفى راقد
شبه فاقد للحياة

وكأني ورقة مقطعة ف كل اتجاه
فلقيتها داخله من سكات على طول
كان نفسي أقول مليون بحبك وقتها
وحاولت أقول..
وفشلت اني أقول!

كبتلي ف الكارت الي كان عد الورد
متخف بكرة وتبقى زي القرد
متسوقش فيها وقوم على بيتك

كتبتلي كلمة «بكرهك جداً»
 لكن عنيا قريرتها «حييتك»
 مسكت إيديا لقيتني ف الحاضر
 «أنا لازم أمشي»
 قلت أنا: حاضر
 لو ماشية إيه يتقال وإيه يتعاد؟!
 لو كان يفيد كُتر الكلام كان فاد
 كل الي نقدر نعمله دلوقت
 ان الفراق يحصل ولكن باحترام
 اسكندرية مقطعاك
 زي التذاكر ف الترام
 اسكندرية مرجعاك
 علشان تدوق طعم الغرام
 كان ليا فيها بيت و بنت ..
 كان ليا فيها البنت بيت
 اسكندرية ليه السيب ..
 إني ضحكت وإني بكيت
 وإني مشيت ..
 وحياتي فجأة ملخبطة

سايب «ميامي» معيطة
 لقيت أيامنا متسية بتفاصيلها
 على الكورنيش
 لقيت أحلامنا متسابة
 صور للذكرى ف استأنلي
 حاولت أقولك استني ..
 ناديتك وانتى مسمعتيش
 ف سبتك تمشي ومشيتي
 وسبت الدنيا لظروفها
 سرحت لقيتني بتخيل ..
 مشاهد بكرة هنشوفها
 «كانت هي ف إيد غير إيده
 وهو ف إيد غير إيدها معدي
 شافت عينه عنيه ارتبكوا
 بصت بصر ف حسوا بضيق
 عُمرُك شفت دموع أسفلت
 على ضلين بيعدوا طريق»
 اسكندرية المتعبة
 كل الشوارع مُرعبة بعد الفراق

ونحلم ليه ببيت واسع
 وقلبك بيا أصلاً ضاق
 ده الفاضل مالحب الفاضل
 ديفوهات ودراما وهستيريا
 وبواقى أماكن ومساكن
 وحنين لرصيف شارع سوريا
 الشارع ده مشينا لآخره
 ومشيت فعيونك لآخرها
 الشارع قاهالي صريحة
 متجيش لو جى معاك غيرها !
 فمشيت فالشارع وأنا بسأل
 سبتيني ازاي أو امتى وليه ؟!
 وحليم كان صوت ف الخلفية
 بيردد نفس الكويليه
 «رميت الورد طفيت الشمع يا حبيبي»
 وأنا قلبي مدمع من ضيقتي
 وبطلع صورتك من جيبى
 ويقطع قلبي مع الصورة
 مكسور بيحب ف مكسورة

بندوس على بعض ف نتعور
 كان لازم يعني ف يوم نيجي
 ونقف ف الشارع نتصور؟!
 رسمتك ألف مونايزا..
 رفضتي تكوفي ف البرواز
 أنا خفيت لكن روحي..
 ف بعدك ماشية على عكاز
 اسكندرية وبحرها
 مع بنت فكت شعرها
 بصت وعينها مدمعة
 مكاتش لسه مجمعة
 ف البحر بصلها وسرح
 أصعب سؤال بعد العلاقة ما تنتهي
 مين إنجرح؟!
 أنا وانتى موجتين التقوا
 واتفرقا
 مبقاش في حلم نحققه ونصدق
 غير اننا نفضل كده
 مركب وشط وموج علي

لو كُنتى أحلام إحصلي
وان كنتي وهم اتنهدي
وسيبيني أدوب جواكي قبل ما تبعدي
ده الحُضن لو من غير دموع
م المستحيل هنعس بيه
اسكندرية تاني آه..
ومتسألش أنا رُحت ليه
اسكندرية المُهلكة..

أرض البكا

والشك

والخوف

والحذر..

أرض الفراق المنتظر

ماشي بقوم ضلي من ع الأرض

مش لاقى حد أسند عليه إلاه

مادد إيديا أشحت إيدين.. لله!

سارح بتشر بني السجائر شرب

البعده هو الحل ولا القرب؟!

أهرب؟!..

هربت كثير ومرتاحتش

أرجع؟! ..

رجعت كثير ومفرحتش

مجروح وهذا لاني مجرحتش

وفتحت قلبي لقلبها تدخل

دخلت وهدت كل شيء مبني

سابت إيديا وربنا سابني

الحضن يقلل فرص الإصابة بالحنين

وأنا عمري ما حضنتها

ففضلت ليها بحن

عايش وبهرب من إلي على من

الدائرة قفلت نفسها واحنا

مبتقاش ما بينا طريق عشان نمشيه

اسكندرية تاني آه وتالت

ومتسألش أنا جيتها بعدك ليه؟! *

مع السلامة يا بحر (النهاية)

الحياة في اسكندرية..
 لسه زي ما هي هي..
 لسه صوت البحر بيرن ف وداني..
 لسه يغرق ف الأغاني..
 لسه مش عارف مكانك
 يعني مش عارف مكاني..
 كل حاجة مكان ما هي..
 إلا أنا.. أنا شخص تاني
 لسه للأيام روايح..
 والحنين داير ترام
 لسه بنلم الحطام..
 والبواقي من اللي فات
 لسه بتتوه بالساعات
 السنين فاتت..

كبرنا..

والحياة كملت بغيرنا

ولسه برضو الحب عاجز

إنه يعمل معجزات

مش هقابلك صدقة تاني

وانتي ماشية ف سيدي جابر..

أو قصاد المنتزه

حتى لو كل الأماكن

والمساكن رقبولنا معاد سوا

مش هتحصل معجزة..

مش هشوفك..

أو هشوفك..

بس في خيالي المريض..

هلمسك طيف من بعيد..

وأحضنك والدنيا تخلص..

والنهار يطلع وأفوق

حلم وحلمته ف هدوء..

فوقت منه لقيتني عايش دنيا تانية..

بيتي غير بيتك وإبني

عمره ما يقولك يا ماما!
 قصة في غاية الدراما..
 حاجة يعني لو خدوها
 السيما تنفع تبقى فيلم..
 يعني كل ما هبقى شايفك
 هبقى عارف إنه حلم
 هصحي على صوت المنبه
 وأبقى نازل شغلي عادي
 وأبتدي رحلة كفاح..
 شخص بيحارب حياته
 للأسف من غير سلاح
 وإنه من غيرك لا يمكن
 يبقى حاسس إنه عايش
 وإنه من غيرك لا يمكن
 يبقى حاسس بالنجاح
 الحياة صعبة وأكيد..
 كل إيد محتاجة إيد
 كل واحد فينا عايز..
 حد منه يكون معاه

حد يستوعب جناحه
أو هروبه من الحياة
وانتي كنتي ملاذ أخير وقت اللزوم..
كنتي حب ف كل لحظة
وكنتي ضحكة ف كل يوم..
للأسف بعدك وقعت
ولسه مش عارف أقوم..
دي النهاية وده اختيارك
واختياري..

مش هراجعك أو هلومك
أو هقلب في اللي فات
لسه برضو الحب عاجز
إنه يعمل معجزات
لو بيعمل كان عمل..
مرة واثنين أو ثلاثة
لسه برضه مفيش أمل
المحاولات استمرت..
واتنحلت ووشي داب
كنت محتاج أي فرصة

أي سكة وأي باب
 في النهاية الخوف حاويتي..
 وانزويت في الاكتئاب
 كل مرة بشوف صورنا..
 وكل مرة أعمل مقارنة
 بين حياتي معاكي قبل..
 وبين حياتي لو حدي بعد
 كل ذكرى وكل لحظة
 وكل كلمة وكل وعد
 لسه مش قادر أصدق
 إني لازم أعيش لو حدي
 لسه مش عارف أصدق
 للأسف ليه سيبنا بعض
 كل شيء كان حلو جداً
 واتقلب سحرك عليا
 كنت مجني عليه وانتي
 كنتي عايشة ف دور ضحية
 كنا تايهين جوا عالم
 كله تراجيديا وغرابة

كنا بنمثل مشاهد « فيلم اسمه اسكندرية »
صدقيني ..

كل شيء كان عكس ظني
عمري ما اتخيلت إني ..
هبقى مجبر ع النهاية ..
لأنها كات جاية جاية

كنت فاكر إنها فترة زعل هتطول شوية
كنت فاكر إنها خناقة وهتخلص ..
لما أجييلك ورد وآجي
تحت بيتك ..

أكلمك تضحك شفايفك
شفت أنا المشهد ده كله ..
بس عمري ما كنت شايفك
شفت ورسمت السيناريو
واتصدمت وقلبي تاه
كتبوا على مشهد فراقنا
« هو ده طبع الحياة »
بكرة غيرها هتيجي تاخذك
م الوجع ومن الآلام



بنت لما تشوفها مرة
تحبها من غير كلام
بنت نازلة من السماء..
بنت جايا لك هدية
بنت غيرها هتيجي بكرة
تحبك في اسكندرية



نقطة ومن أول يناير



بقيت عايش في دوامة ..
 يحاول بس الألفي رسالة وعلامة
 تقولي «أنا صح»
 .. تقول كمل
 تقول متخافش
 هبطل قفش ..

خلاص
 من بكرة هتعامل بكل برود وأعيش عادي
 هعيش الدنيا ع الهادي ..
 يجوز لسه الطريق مبدأش
 معلوم على ضهري يمكن وقتها مغرقش
 هسلم كل شيء لله ..
 وأقوله يا رب عوضني
 وخذ يا أيديا م اللي أنا فيه ..
 لأنني احترت لما اخترت
 خلاص مش عارف أعمل إيه
 هقوله يا رب دبرني ..
 وقدرني
 وطيب خاطري

واجبر بيه

هقوله يا رب أنا الغلطان

وأنا اللي جريت ورا الأوهام

مكنتش للأسف داري

بأن الحزن إجباري

وإني غلطت لما آمنت للأيام

ألفت النعمة معرفتش بأن لكل شيء معنى..

وإن الدنيا حلوة وقادرة تخدعنا

وإن الناس وحتى إن كانوا أقرب ناس

مبيحسوش بأوجاعنا

هقوله يا رب طمني

بقيت في الدنيا وكأني مسافر سكتي بعيدة..

وصلح قلبي واجعلها «سنة سعيدة»

٢ يناير

والأمل موجود

بحلم بيكرة ويتسم للجاي

معرفش ليه وإزاي ..
 حاسس بإني هفوق ..
 وأرجع لنفسي وأعيش
 مع إن يعني مفيش
 قدامي أي دليل
 ولا عندي أي بديل
 ولا حتى فيه رسالة
 لكن بقول جايز الفرحة متشالة ..
 وإن جات هتيجي كده
 بالصدفة و ف ثانية
 وساعات بقول برضو
 «دي طبيعة الدنيا»
 بفرح وأنا قلقان
 علشان قالولي زمان
 فيه حاجات بتيجي عشان
 تاخد حاجات ثانية
 الدنيا بتبدل .. كل الحاجات بحاجات ..
 والرزق متقسم
 ولا حد ناقصه قيراط

فيه ناس بتاخذ رزقها ف مالها
وناس بتاخذ رزقها عيالها
وناس بتاخذ رزقها جمالها
وناس بتاخذ رزقها بلانها
عايشة الحياة راضية بضيق حالها
وفيه ناس بتاخذ رزقها صحة
وناس بتاخذ رزقها
راحة..

وناس بتاخذ رزقها
طيبة وسماحة وش، وصراحة
احسبها بالراحة
تلقى الميزان مساواة
علشان ميزان الله..
ليه حكمة مش هتبان.. غير بعد ما تصير

٣ يناير..

لسه الأمل موجود.. بالعكس ده بيكبر !

٤ يناير..

دلو قتي أنسب وقت
 إنك تقول هبداً
 وتقول «أنا أقدر»..
 وتقول خلاص «هانت»
 الدنيا لو كانت.. متعاشة بسهولة
 كان يبقى إيه الفكرة.. من إننا بنُختبر؟!
 لازم في عز النجاح
 تاخذ قلم معتبر..
 لازم ف عز الفرح تلقى الزعل داخل..
 وف كل موقف حلو..
 العكنه تختمه
 وف كل قعدة عزا..
 صوت ضحكنا بنكتمه
 الدنيا نسخة حياة..
 لكن مجرد Demo

فيه دنيا ثانية هناك ..
 مفيهاش وجع وهلاك
 ولا فيها شيء بكاك ..
 ولا رزق بنقسمه
 لكن حياتنا الآن ..
 بتصبحك زعلان
 وتيمك شقيان
 وترازي فيك علشان
 الدنيا رحلة شقا
 مش فرحة بالمعلقة ..
 ولا حاجة ع الجاهز
 لازم تكون جاهز .. لتقلبات الزمن .. ولقسوة الأيام

٥ يناير

طول مانت فيك النفس ..
 حارب على الأحلام !

٦ يناير

السعي هو الهدف.. والركع النية

الدنيا رحلة كفاح..

والرزق خفية

والي زرعته ف يوم..

راح تيجي يوم تحصده

كل اللي أنا بقصده..

ان الدأب مفتاح وإن النجاح غاية

وإن انت لازم تكون دايمًا على دراية

إن الطريق.. هيطول

وفيه ألف باب مقفول

والحظ مبيخدمش

إلا اللي بيحاول

مد إنت بس إيدك

والدنيا هتناول

قدم مشيئة وقول

«هعمل بإذن الله»

ده مخابش عبد اتكل

أبدأ على مولاه..

بس انت قول واعمل

واتعب ونام مهدود

هتحنس إنك عشت

وليك كيان ووجود

متقفش مستني

الفرصة مش هتعود

وإن جات في يوم إمسك في الفرصة

متسيبهاش

٧ يناير

قول إن أجمل يوم في الدنيا لسه مجاش !

٨ يناير

لوع الوجد..

فالحزن مش ممكن يدوم
 الحزن آه بيبدأ كبير لكن
 بيصغر كل يوم
 ابتسم للدنيا جايز
 تمشي زي ما كنت عايز
 لحظه واحده ساعات بتفرق
 إعمل اللي عليك وجرب
 مهما حلمك كان بعيد
 بكرة بالتدريج يقرب
 الحياة عايزة المقابوحة
 عايزة واحد عنده صبر
 إن بعد العسر يسرا
 إن بعد الكسر جبر
 بكرة بعد الحزن توصل..
 كل جرح وليه نهاية
 والي قال إنك هتفشل..
 وإن ده آخر الحكاية
 بكرة يتمنى يقابلك..
 وإن مش راح تبقى فاضي

اللي مش شايفك ف بكرة ..
بكرة انت تشوفه ماضي

٩ يناير ..

المهم إنك تكمل .. بس كمل وانت راضي

١٠ يناير

اللي سابك سيبها تمشي ..
او عى تزعل م الفراق
واوعى تدخل يوم علاقة
احب من غير كبرياء
اللي فاتك مش يتاعك
لو هتعمل حتى إيه
واللي مش ليك مش هتاخده
مهما هتجارب عليه
هي ماشية حياتها ماشية

انت ليه توقف حياتك ؟!
 يعني ليه تفضل مصمم
 تنتظر والقطر فاتك ؟!
 هي بكرة تحب غيرك
 وانت بكرة تحب تاني
 مش بقولك كن كويس
 عادي خد وقتك وعاني
 بس متطولش حزنك
 ع الي كان وياك وسابك
 قوم وكمل بعد إذنك
 لسه فيه أهلك .. صحابك
 لسه فيه حواليك كثير

١١ يناير..

افتكر مهما حصلك .. إن كله بيقتي خير

النهاردة يجوز تقايل
واحدة هتسيك ماضيك
واحدة ليها تكون شريك
واحدة فعلاً تشتريك..
وتكون مكانك
ضحكتك فرحة زمانك
واحدة تتحمل جنانك..
واحدة يتحارب عليك
النهاردة يجوز تقايل
واحدة تنفع تبقى أهل
واحدة أول ما تقايلها
تلقى كل الصعب سهل
وتلقى كل المر مر
وتلقى كل الماضي هان
واحدة لما تكون ف قلبك..
تحسها صاحبة مكان

واحدة بتقدم حلول ..
 بنت واحدة بكل دول
 وقت ما تشوفها تقول
 هي دي البيت والحنان

١٣ يناير

واحدة فعلاً تبقى هي ف دنيتك معنى الأمان

١٤ يناير

لسه مستني إني أقابل
 واحدة تديني اهتمامها
 واحدة ترسم دائرة حواليا وتاخدني
 تبقى طفلة كبيرة لو نامت ف حضني
 تبقى سكة أنا ماشي فيها بدون هموم
 تبقى ضحكة ف كل يوم
 تبقى إيد متسبش إيدي ف أي وقت

تبقى ضهر أسند عليه وقت اللزوم
وأبقى متأكد معها.. إني مش محتاج لغيرها
بنت تبقى الركن والبيت الوحيد

١٥ يناير

واتقابلنا..

والحياة احلوت وبدأت من جديد

بنت على هيئة سعادة

ماشية بشويش في الوريد

شوقتها حسيت بلمسة

كهربا يتمسك ف روحي

بنت أجمل من طموحي..

بنت أجمل م اللي كنت أتخيله..

حسيت ساعتها بأن عمري

يدوب كأنه ف أوله

حسيت مشاعري اتلخبطت

والقلب تاه

أسلوب عيونها في الكلام

ملفت أوي للانتباه

أسلوب عيونها في الكلام

أسلوب حياة..

كات هي أول حاجة حلوة بجدة تحصيلي السنة دي

١٦ يناير

يوم ما اتقابلنا هو ده كان عيد ميلادي

١٧ يناير

جميلة.. بسيطة.. متفاهمة..

وفاهمة عنيا من غير شرح

عيونها مسببات للفرح..

أثرها بيان في كل مكان..

فراشة وطائرة حواليا

ولو سألوني عن معنى الجمال مثلاً

بقول «هي»

بقول عنها إنها «الحلوة»..

المهمة الملهمة الهادية

قنوعة بأي شيء راضية..

وطفلة ف وقت ما تهزر

وتتدلع عليا بشوق

وعاقلة ف وقت ما أناقشها

فنبحل الخلاف بهدوء

بتتجنن ساعات لكن..

بموت ف جنانها لو طول

تعدي دقيقة أبصلها

ف تبقى أجمل من الأول

فسبحان من خلق حوا..

وجعلها ف لحظة تتحول

فتبقى الأم لو خافت عليا ف يوم..

وتبقى حبيبتى

لو قسمت معايا هموم..

وتفضل صاحبتي وبنتي وطريقي الجاي..

ده كله ف واحدة

يبقى الواحدة متكفّيش يا ناس إزاي!
دي جدعة ف وقت ما أحتاها
تسيب الدنيا وتجيلى
بتسمعني أما بحكيلها..
وبسمعها أما تحكيلى
لقيت نفسي معاها أكيد
وحسيت إن قلبي جديد
نسيت كل اللي عشته زمان
وحبيت الحياة علشان
لقيتها ف قلبي واخدة مكان
وماشيه من وريد لوريد

١٨ يناير..

بحبك انتي بالتحديد

أشهد لك إنك أول بنت أحسن براحتي وأنا معاها
أشهد لك إنك

أول بنت تعلم قلبي ازاي يفرح
من غير أسباب
وكأنك باب..

على دنيا بسيطة بدون تعقيد
وكأنك فعلاً عمر جديد..
وكأنك سر ملوش تفسير
غير إنك غير..

مختلفة وكلك حيوية وطاقة وبهجة
وسحر وتفصيل
أشهد لك إنك

أول بنت تعرفني إن الحب جميل
وإن الأيام ممكن تتعاش من غير أوجاع
وكمان مش شرط الحب يكون في نهايته وداع
بني آدم ضايع من قبلك

قابلك فارتاح
كان جايلك مش قادر يمشي..
ومسكتي إيديه ف طلعله جناح..
أشهد لك إنك أول بنت بتدخل قلبي
بدون مفتاح
أشهد لك إنك أول بنت
تكون فاهماني وقابلاتي
بكل عيوبي.. وبغيرتي وتكشيرتي وقلقي
وخوفي من الغيب ومن المقدور

٢٠ يناير

لولا ان أنا لامسك كنت هقول
دي أكيد من نور

٢١ يناير

سحر البدايات .. لازم يفضل ..
 لازم نتعلم م الماضي
 لازم منلفش نفس الدائرة على الفاضي
 مين قال سحر البدايات بيذول
 الحب الصبح اللي بيفضل
 موجود على طول
 الحب الصبح اللي يخلينا نكون أحسن ..
 ويطلع أجمل شيء فينا ..
 أو يقدر حتى يخلينا ..
 عارفين عايزين إيه م الأيام ..
 ويشجع جداً ويقوي
 الحب الصبح اللي يخليني أكتبك ألف «بتحلوي»
 أنا كنت ف إيه وصبحت ف إيه؟! ..
 شوفي اتغيرت معاكي ازاي وبقيت مبسوط ..
 ده أنا كنت خلاص على وشك الموت!
 مستسلم للموج وأنا بغرق مش عارف ليه

٢٢ يناير

دلو قتي خلاص قادر أواجه كل اللي أنا فيه

٢٣ يناير..

الوقت يفوت..

ومكانك جوايا بيكبر أكثر م الأول وزيادة

بما إنك مختلفة طبيعي

متكونش النهايات متعادة

وإن الأيام بعد البدايات

مش دايمًا برضو تكون سادة

ولا قاعدة اننا نعشق ونمل

ونأخذ جنب ونتفارق

كل اللي أنا عشته زمان قبلك

بعتبره مراحل ومفارق

أوجاع يمكن تكفير لذنوب..

أو يمكن دين ويتسدد
 أنا فعلاً مش قادر أحدد..
 لكن دلوقتي أقدر أقولك
 لو فات الوقت وفجأة بقينا ف آخر العمر
 أنا هفضل مغرم والله يعنيكي السمر..
 أنا هفضل لنهاية عمري
 شايفك وردة ف سن العشرين
 شايف بتوتة بتتياهي بلبس القسائين
 شايفك حلمي وبطلة فيلمي
 ولاخر يوم انتي أميرقي

٢٤ يناير

أنا هفضل أحبك من قلبي مهما كبرقي

٢٥ يناير

إطمني..
كل اللي طالبه حاليا..
تتمني أمنية..
تتمني ديلة بتربطك بيا
وتعيشي حلم تصدقه..
وتعيش سوا ونحققه..
وتسيبي ليا كل نقص أكمله
ونسيب لربنا كل صعب يسهله
إطمني..
كل اللي هقدر أعمله
أنا هعمله..
من قبل حتى ما تحتاجيه

٢٦ يناير

رغم اني خايف متخافيش .. أنا جنب منك خايقة ليه ؟!

٢٧ يناير

الجنة ممكن تبقى بيت ع الأرض ..
طوبه مودة وطوبه رحمة هيتبني
انتى اللي حبك ليا كان أكبر دليل ..
على ان فعلاً رينا بيعحبني
أنا بوعدك ..

الجي خير .. مقدرش أقولك غير
باني خلاص بقيت

مرتاح عشان شايفك معايا بتبني بيت
شايفك ف ضهري بتسنديني وبسندك
بقى كل همى ازاي أعيشلك وأسعدك
الحب روح بتميل لروح فتروحلها ..
وأنا روحي راحت ناحيتك معرفش ليه

٢٨ يناير

قسمة ونصيب ..

ترتيب إلهي ملوش سبب
عوضني عن كل اللي ياما حلمت بيه

٢٩ يناير ..

أنا مش مختار .. ولا محتاج وقت أحسب قرارات
أنا آسف على مليون مرة قولتلكم فيها
«الناس فترات»

دلوقتي أنا شايف عمري بحاله عشان شايفك
بتهجي الدنيا كلام بتقولهولي شفايفك
وبشوفني العيل والراجل ..
وأنا وياكي

لو جالي زهايمر هنسى أنا مين
لكن مش ممكن هنساكي ..

ولذلك جايلك بتمنى
تفتحي بشويش باب الجنة
وتوافقي أعيش عمري معاكي

٣٠ يناير

م اللحظة دي ..
ومن المكان اللي احنا فيه
بعلنها للناس كلها ..
ويقولها وأنا واعى وتمام
مدرك بأن الكلمة وعد وعقد محتاج التزام
فيه حاجات متقالش بكلام
وعشان كده ..
لازم أقولها وانتى بتبصي ف عيني

٣١ يناير

أنا هبقى أسعد شخص لو تتجوزيني!

ولذلك جايلك بتمنى
تفتحي بشويش باب الجنة
وتوافقي أعيش عمري معاكي

٣٠ يناير

م اللحظة دي ..
ومن المكان اللي احنا فيه
بعلنها للناس كلها ..
وبقولها وأنا واعي وتمام
مدرك بأن الكلمة وعد وعقد محتاج التزام
فيه حاجات متقالش بكلام
وعشان كده ..
لازم أقولها وانتي بتبصي ف عيني

٣١ يناير

أنا هبقى أسعد شخص لو تتجوزيني!



للمزيد من الروايات والكتب الحصرية
انضموا لجروب ساهر الكتب

sa7eralkutub.com

او زيارة موقعنا